

焮

掌

錄

嘉慶甲戌二月錄十數條入通志錄杭氏序
識之矣福生書勝杭氏所爲文區偶
多吾謂家而不惠辨而無用紀也雕茲擣
去之記

六藝之旨精微難窺選事者輒復離文析辭
造端指事以疏導其所得而卮言出矣浮休
乾熙吾議其淺齊諧諾臯吾病其誕提挈盛
軌約有數家王楙叢書辨而肆沈括筆談典
而深程大昌演繁露博而覈外此皆其支流
餘裔屢更僕而不能悉其失得也錢唐汪君
秀峰年少而氣銳發篋而探索之其高者遠
者故嗛嗛以有待而特比切其事危疑其論

以求前哲之閒得毋傲與嘖與鬼且瑣與甚
察而不惠辨而無用多事而寡功與雖然爲
之猶賢乎已秀峰無亦以是爲始基鏗而不
舍以馴致乎高且遠者則幾矣仁和杭世駿
撰

嘉慶五年四月沿佛前二日得於郡
城市中是日午後大雨

江都進齋記

壬戌秋七月又閱一過

丁卯秋七月

焯掌錄卷上

錢唐 汪 啟淑

輯

漢儒林傳索隱曰自漢已來儒者皆稱生亦
先生者省字呼之耳高帝紀以魏地萬戶
封生師古曰生猶言先生賈誼傳懷沙賦
生之無故兮師古曰生先生也貢禹傳朕
以生有伯夷之廉史魚之直愚按自漢已
前即有此稱史記越世家楚王曰生休矣

朱公長男曰故辭生去蘇秦傳甚矣齊之
爲蘇生報仇也徐廣曰生一作先亦有單
稱先者史鼂錯傳學申商刑名於軹張恢
先所徐廣曰先即先生又漢書錯傳上招
賢良公卿言鄧先師古曰鄧先猶云鄧先
生也史匈奴傳其儒先以爲欲說折其辨
漢書儒先作儒生

爲公主立廟者有二後漢桓帝紀延熹五年

祠湖陽新野公主魯哀王壽張敬侯廟注
光武姊湖陽長公主新野長公主並光武
時立廟魏書禮志華陰公主帝姊也元紹
之爲逆有保護功故別立其廟於太祖廟
垣後因祭薦焉

後漢杜詩傳士卒見藻注言其和睦歡悅如
見之戲於水藻又劉陶傳武旅有見藻之
士魏志文帝紀臣妾遠近莫不見藻魏書

崔光傳榮光帝京士女藻悅

漢雋不疑傳勝之躡履起迎黨錮傳序屣履

到門

鄭玄傳同

魏志王粲傳蔡邕車騎填巷賓

客盈坐聞粲在門倒屣迎之又邴原傳注
引原別傳曰原至門下通謁太祖大驚喜
擎履而起遠出迎

與光武同學不獨嚴光而已光武紀注東觀
記曰受尚書於中大夫廬江許子威資用

乏與同舍生韓子合錢買驢令從者僦以
給諸公費張酺傳注東觀記曰酺從祖父
充與光武同門學光武即位求問充充已
死方術高獲傳少遊學京師與光武有素
舊

唐書職官志凡天下水泉三億二萬三千五
百五十九其在遐荒絕域迨不可得而知
矣其江泗自西極達於東溟中國之大川

者也其餘百三十五水是爲中川其又千二百五十二水斯爲小川也困學紀聞云水經引天下之水百三十七江河在焉酈氏注引枝流一千二百五十二

禮雜記里尹主之孔疏案撰考曰古者七十二家爲里洛誥傳云古者八家爲隣三隣爲朋三朋爲里鄭云蓋虞夏時制也韓詩外傳亦云八家爲隣

則天封禪嵩岳尊夏后啟爲齊聖皇帝封啓
母神爲玉京太后玄宗尊臯陶爲德明皇
帝皆見唐禮志

朱子奢褚遂良鄭朗魏謩皆言人君不閱史
漢東方朔傳殷作九市之宮而諸侯畔應劭
曰紂於宮中設九市後漢靈帝紀帝作列
肆於後宮使諸采女販賣更相盜竊爭鬪
帝著商估服飲宴爲樂晉愍懷太子傳於

宮中爲市使人屠酤手揣斤兩重輕不差
又令西園賣葵菜籃子雞麪之屬而叔其
利載記劉聰立市於後庭與宮人譙戲或
三日不醒宋少帝紀帝於華林園爲列肆
親自酤賣南齊東昏侯傳又於苑中立市
大官每旦進酒肉雜肴使宮人屠酤潘氏
爲市令帝爲市魁執罰爭者就潘氏決判
南史自爲市吏錄事宣德太后令曰芳樂華林並立

闌闌踞肆鼓刀手銓輕重南史齊廢帝紀
又開渠立埭躬自引船埭上設店坐而屠
肉於是百姓歌云閔武堂種楊柳至尊屠
肉潘妃酤酒梁書高帝紀移檄京邑曰掖
庭有裨販之名北齊書後帝紀爲窮見之
市躬自交易舊唐書中宗紀景龍三年三
月幸立武門上遣宮女爲市肆鬻賣衆物
令宰臣及公卿爲商賈與之交易因爲忿

爭言辭猥褻上與后觀之以爲咲樂

漢書韓延壽傳延壽爲潁川太守門市當車
願有所言曰今旦明府早駕當時稱太守
爲明府容齋隨筆云唐人以稱縣令

會稽山陰兩邑浙中每合言曰山會何不稱
稽陰陳書褚玠傳高宗謂蔡景歷曰稽陰
大邑久無良宰

隋柳或傳時制三品已上門皆列戟左僕射

高頴子弘德封應國公申牒請戟或制曰
尊有壓卑之義子有避父之禮豈容外門
旣設內閣又施事竟不行隋時父子不並
施戟至唐則不然舊書張儉傳唐制三品
已上門列棨戟儉兄弟大師三院門皆立
戟時人榮之號爲三戟張家又崔義玄傳
東都私第門琳與太子詹事珪光祿卿瑤
俱列棨戟時號三戟崔家又楊貴妃傳再

從兄銛授三品上柱國私第立戟又韋斌
傳斌授五品時兄陟爲河東太守堂兄由
爲右金吾將軍縉爲太子少師四人同時
列戟又李愿傳舊制勲至上柱國賜門戟
即令賜愿乃與父並列棨戟於門又李垣
傳垣爲戶部尚書峴爲吏部尚書知政事
嶧爲戶部侍郎銀青光祿大夫兄弟同居
長興里第門列三十戟兩國公門列十六

戟一三品門十二戟榮耀冠時

舊唐朱敬則傳代以孝義稱自周至唐三代
旌表門標六闕又楊炎傳孝著二代門樹
六闕

梁書諸夷傳盤盤國大通元年其王使使奉
表曰揚州閭浮提震旦天子又稱常勝天
子足下于陀利國天監十七年遣長史毗
員跋摩奉表曰常勝天子陛下狼牙脩國

天監十四年遣使阿撒多奉表曰大吉天

子足下其表文皆似中國人潤色而成稱

謂則王弼州藝苑卮言已摘出但未詳耳

後漢禮儀志大喪臣請驛馬露布李雲傳露

布上書移副三府斯時露布之名猶未專

屬之戰捷也隋禮儀志云後魏每攻戰尅

捷欲天下知聞廼書帛建於竿上名爲露

布其後相因施行

魏書傳永傳高祖每歎曰上馬能擊賊下馬作

露布唯傳
脩期耳

開皇中廼詔太常卿牛弘太子

庶子裴政撰宣露布禮及九年平陳元帥
晉王以驛上露布兵部奏請依新禮宣行
文章緣起云露布漢賈弘爲馬超代曹操
作

蜀志超傳
無此語

後漢張衡傳且河洛六藝篇錄已定後人皮
傳無所容纂注傳音附揚雄方言曰秦晉
言非其事謂之皮傳謂不深得其情核皮

膚淺近強相傳會也衡東京賦末學膚受
貴耳而賤目注膚受若皮核之不經於心
胸

車輪括頸不明其意想亦魏齊時輕俠氣習
北齊高季式傳命左右索車輪括司馬消
難頸又索一輪自括頸仍命酒引滿相勸
北史劉昶女傳昶子居士每大言曰男兒
要當辦頸反縛蘧蔭上作獠舞取公卿子

弟膂力雄健者輒將歸家以車輪括其頸而棒之殆死能不屈者釋而與之交

潘岳西征賦搜佞哀以拜郎注引王莽事魏書佞幸王叡傳叡之葬也假親姻義舊哀經縞冠送喪者千餘人皆舉聲慟泣以要榮利時謂之義孝佞哀義孝可爲的對

喪大記君蓋用漆鄭云用漆者塗合牝牡之中也賈公彥士喪禮疏云古者棺不釘愚

意自漢已後也後漢禮儀志大喪東園匠
武士下釘宋書禮志有釘官百官志不載
蓋在九品之外梁徐勉傳屬續纔畢灰釘
已具

宋書武帝紀丁旡驍勇有氣力時人爲之語

曰勿跋扈付丁旡魏書崔楷傳楷性嚴烈

能摧挫豪彊故時人語曰莫獠

都買反

獠孤楷

反付崔楷南齊書桓庾傳太祖以黃回握

彊兵必遂反覆庾請獨往刺之一時人爲之語曰欲併張問桓庾此固當時之語作史者得無蹈襲耶

祖君彥檄隋煬帝云罄南山之竹書罪無窮決東海之波流惡難盡世皆賞之不知此特公相沿襲耳漢公孫賀傳朱安世曰南山之竹不足受我辭後漢隗囂傳移檄告郡國曰楚越之竹不足以書其惡

謂王莽

典

略公孫瓚表袁紹罪狀紹之罪戾雖南山之竹不能載魏書孝莊紀介朱榮敕曰拔髮數罪蓋不足稱斬竹書愆豈云能盡南齊東昏侯紀宣德太后令曰罄楚越之竹未足以言梁書高帝紀檄東昏曰書寓縣之竹未足記其過窮山澤之兔不能書其罪世祖紀檄侯景曰南山之竹未足言其愆西山之兔不足書其辜周書宣紀論窮

南山之簡未足書其過盡東觀之筆不能記其罪

呼父妾爲姨六朝已有此語南史齊宗室傳衡陽王鈞所生區貴人病便加慘悴左右依常以五色餠飴之不肯食曰須待姨差呼兄子爲姪禮經所無宋書胡藩傳太守韓伯見謂藩叔尚書少廣曰卿此姪當以義烈成名

俗稱居憂者爲孝子南齊周盤龍傳太祖曰
我若不沒虜則應破虜兒不作孝子便當
作卅子也又卞彬傳可憐可念尸著服孝
子不在日代哭

漢薛宣傳下至財用筆研皆爲設方略此研
字之始又張安卅傳彭祖又小與上同席
研書

荀子堯問篇周公曰吾所執贄而見者十人

還贄而相見者三十人貌執之士者百有
餘人欲言而請畢事者千有餘人臨川王
氏已斥其妄劉向韓嬰祖述而演其說又
加甚焉說苑曰周公踐天子之位七年布
衣之士所執贄而師見者十人所友見者
十二人窮巷白屋所先見者四十九人時
進善者百人教士千人朝者萬人韓詩外
傳曰周公所執贄而師見者十人所還贄

而友見者十三人窮巷白屋之士所先見者四十九人時進善者百人官朝者千人諫臣五人輔臣五人拂臣六人執干戈以至於封侯而同姓之士百人

秦叔寶傳陪葬昭陵太宗特令所司就其塋內立石人馬以旌戰陣之功舊書云今無功汗馬者冢上立石人馬失其意矣宋景文新書瓊傳刪去此語近崑山徐氏撰讀

禮通攷引據該博而獨遺叔寶之事劉煦
之論循名責實冢制之有媿者多矣潘昂
霄金石例以爲石馬起於霍去病冢不知
其何所本也

詩人用不借爲艸屨亦未爲安鄭注儀禮喪
服傳繩菲今時不借也賈疏云此凶荼屨
不得從人借亦不得借人然則非有喪者
不得云不借也

詩家用事大槩轉相蹈襲耳馮衍幽通賦捷
六枳以爲籬兮章懷太子注引汲冢周書
詩人即以爲枳棘之枳矣史張儀列傳索
隱曰江南謂葦籬曰芭籬此芭犁即織水
葦所以爲葦籬也詩人即以爲竹芭之芭
矣

古人行文用字不尚隱僻文心雕龍練字篇
云一字詭異則羣句震驚三人弗識則將

成字妖矣顏氏家訓文章篇云沈隱侯曰
文章當從三易易見事一也易識字二也
易讀誦三也邢子才常曰沈侯文章用事
不使人覺若胸臆語也深以此服之

六朝文字不須排偶亦貴諧適魏志齊王芳
紀注郭頒撰魏晉世語蹇乏全無宮商後
魏祖瑩傳瑩之筆札亦無乏天才但不能
均調玉石

魏志武帝紀注引魏書嘗於南皮一日射雉
獲六十三頭文帝紀注引典論自叙與族
兄子丹獵於鄴西終日手獲麋鹿九雉兔
三十北齊暴顯傳曾從魏孝莊帝出獵一
日之中手獲禽獸七十三周齊王憲子賁
傳從憲獵於鹽州一圍之中手射野馬及
鹿十有五頭

樗里疾鼂錯魯恭桓範皆有智囊之目論衡

驗符篇云賈誼智囊之臣

趙壹稱皇甫規爲仁兄關羽稱徐晃爲大兄
馬良稱諸葛亮爲尊兄

吳志孫皓滕夫人傳皓內諸寵姬佩皇后璽
紱者多矣魏書匈奴劉聰傳時稱后者四
人佩皇后璽綬者七人晉書載記聰以其
皇后靳氏爲上皇后立貴妃劉氏爲左皇
后右貴嬪劉氏爲右皇后靳氏死又立上

皇后樊氏又中常侍王沈養女立爲左皇
后中常侍宣懷養女爲中皇后粲嗣僞位
尊聰后靳氏爲皇太后樊氏號弘道皇后
宣氏號弘德皇后王氏號弘孝皇后周書
宣帝紀大象元年立妃朱氏爲天元帝后
七月納大後丞司馬消難女爲正陽宮皇
后改天元帝后朱氏爲天皇后立妃元氏
爲天右皇后妃陳氏爲天左皇后二年二

月立天元皇后楊氏爲天元大皇后天皇

后朱氏爲天大皇后天右皇后元氏爲天

右大皇后天左皇后陳氏爲天左大皇后

正陽宮皇后直稱皇后三月初置天中大

皇后立天左大皇后爲天中大皇后立妃

尉遲氏爲天左大皇后

楊皇后傳帝後自稱天元皇帝號后

爲天元皇后尋又立天皇后及左右皇后

與后爲

五皇后

舊唐代宗紀大歷六年上御宣政殿試制舉人至夕策未成者令大官給燭俾盡其才此塲屋給燭之始

爛漫有數解尚書大傳卿雲爛漫上林賦麗靡爛漫於前此曄曄絢爛之意也沈約郊居賦布濩南池之陽爛漫北樓之後後魏中山王攸傳細艸不除將爲爛漫則延蔓也莊子在宥大德不同而性命爛漫矣王

延壽靈光殿賦浩浩汙汙流離爛漫李善
注遠散離貌列女傳夏桀播棄禮義淫於
婦人求四方美人積於後宮爲爛漫之樂
後魏書禮志三代之衰邪音間起則有爛
漫靡靡之樂周書宣帝紀散樂雜戲魚龍
爛漫之技常在目前隋書樂志齊武平中
有魚龍爛漫俳優侏儒山車巨象板井種
瓜殺馬剥驢等名曰百戲則言樂之淫靡

也字書本無熡字今多作爛熡非也

恬即甜字後鄭注周禮酒正云恬酒注盐人云恬盐皆作甜字解

古字虞與吳通魯頌不吳不敖褚先生武帝本紀引之作不虞不驚

與封禪書異

陸氏釋文

曰何承天云吳字誤當作吳從口下大胡化反此音恐驚俗也孔疏曰定本娛作吳娛與虞通虞即與吳通國語虞山漢地理

志以爲吳山

在汧縣

又北吳當時以爲虞公

羊傳晉士鞅衛孔圉帥師伐鮮虞釋文云
虞本或作吳音虞史記趙世家索隱河東
太陽山虞在西上有虞城是亦曰吳城虞
吳音相近故舜後亦姓吳非獨太伯虞仲
之裔路史國名紀今解之虞鄉一曰吳在
虞城北十三州志云平陸吳山上有虞城
又曰餘虞即虞吳今長興東北四十二有

餘虞浦一名餘吳溪

漢書乎皆作庠吳之爲虞疑當時書體如此
吳興有弁山見脩地志者云一作下不知弁
下本一字成十八年左傳弁糾御戎釋文
云弁本又作下同漢哀紀贊下射武戲蘇
林曰手搏爲下甘延壽傳試弁爲期門孟
康曰弁手搏東方朔以下莊爲弁嚴杜欽
傳以小弁爲小下後魏宋弁傳高祖賜名

爲弁取弁和獻玉楚王不知寶之也

烝民詩序任賢使能周室中興焉孔疏云周
室旣衰中道復興陸氏釋文無音義則讀
如本字可知

魏志武帝紀注引三輔決錄注覩漢祚將移
謂可季興蜀志杜微傳諸葛亮與微書輔
此明主以隆季興之功呂凱傳受遺託孤
翊贊季興三國時人以光武爲中興繼此

者爲季興對季而言中字所以有仲音

魏書游肇傳博通經史及蒼雅林說謂三蒼
爾雅呂忱字林許慎說文也唐書選舉志
學書日紙一幅閒習時務策讀國語說文
字林三蒼爾雅凡書學石經三體限三歲
說文二歲字林一歲又職官志書學博士
掌教文武官八品已下及庶人之子爲生
者以石經說文字林爲專業餘字書兼習

之

漢谷永傳注互字或作牙言如豕牙之盤曲
犬牙之相入也今世字書或作牙引周書
文苑傳序以明所出豈知監中之刻訛俗
特甚豈可以爲據乎

畫虎不成反類狗後漢馬援傳語畫龍不成
反爲狗孔僖傳語

訾嘉珍門察乃賊武元衡者見李師道傳

魏志荀彧傳注引張璠漢紀荀淑拔李昭於
小吏友黃叔度於幼童世說注引汝南先
賢傳袁宏友黃叔度於童齒薦陳仲舉於
家巷魏志和洽傳注引汝南先賢傳許劭
始發明樊子昭於鬻幘之肆出虞永賢於
牧豎召李叔才鄉閭之閒擢郭子瑜鞏馬
之吏援楊孝祖舉和陽士

高士傳許劭名
知人歷客舍則

知虞求賢入酒
肆則拔樊子昭

荀子不苟篇新浴者振其衣新沐者彈其冠
人之情也其誰能以已之僬僬受人之搢
搢者哉楊倞注僬僬明察之貌搢當爲惑惑悞也韓詩外傳新
沐者必彈冠新浴者必振衣莫能以已之
皜皜容人之混汚二子皆在屈原後立言
果欲相襲耶

燁掌錄卷下

錢唐 汪 啟淑 輯

青苗之法唐代已行之舊唐代宗紀永泰二年五月丙辰稅青苗地錢自乾元己未天下用兵百官俸錢折乃議於天下地畝青苗上量配稅錢命御史府差使徵之以充百官俸料每年據數均給之歲以爲常式大歷三年御史大夫崔渙爲稅地青苗錢

使給百官俸錢不平詔尚書左丞蔣渙按
鞠貶崔渙爲道州刺史八年敕天下青苗
地頭錢每畝十五文率京畿三十文自今
一例十五文德宗紀貞元八年初增稅京
兆青苗畝三錢以給掌閑驍騎

漢梅福傳倒持奉阿授楚其柄後漢何進傳
倒持干戈授人以柄唐張說傳倒持劍戟
示人鑄柄

晉書宣帝紀論竊鍾掩耳以衆人爲不聞舊
唐哀帝紀論亦云盜鍾掩耳嫁禍於人王
厚齋云出淮南子魏書介朱榮表已用之
曰掩眼捕雀塞耳盜鍾

魏志陳琳傳及後漢何進傳皆言諺

有掩目捕雀

二十八宿之星星古皆謂之七星月令季秋
之月昏七星中注疏無所釋蓋與柳張翼
軫例矣史天官書七星頸漢地理志周地

柳七星張之分野律書云七星者陽數成於七故曰七星

鈕今人所以綴衣蓋是紐字喪大記結絞不紐孔疏曰生時帶並爲屈紐使易抽解若死則無復解義故絞束畢結之不爲紐也鈕是姓於物無所附麗印紐鏡紐亦當從系奚獨于衣紐轉從金耶

鄭注喪服傳云婦人不殊裳衰如男子衰下

如深衣深衣則衰如帶下又無衽又曰衽所以掩裳際也賈疏云婦人之服連衣裳今世婦人言歛衽非也

魏志武帝紀注引孫盛雜記曰寧我負人無人負我後漢鄭玄傳注引魏氏春秋司馬文王曰寧我負人無卿負我梁侯景傳寧使我負人不使人負我千古奸雄心事若出一轍晉書載記沮渠羅仇曰寧人負我

無我負人北齊文襄紀寧人負我不我負
人陳高祖紀沈泰奔齊詔曰無我負人雖
反其言而用之然亦違心之談

魏書序紀惠皇帝未親政事太后臨朝遣使
與石勒通和時人謂之女國使又皇后列
傳桓帝皇后祁氏平文崩后攝國事時人
謂之女國后

白衣尚書見後漢鄭均傳白衣宰相見唐李

泌傳

南齊桓康傳所經村邑恣行暴害江南人畏之以其名怖小兒魏楊大眼傳淮泗荆沔之間有童兒啼者恐之云楊大眼至無不即止又高車傳北方之人畏嬰兒啼者語曰倍侯利來便止朝野僉載僞趙石虎以麻秋爲帥秋胡人暴戾好殺國人畏之市有兒啼者輒恐之曰麻胡來啼聲即絕大

業拾遺煬帝將幸江都令將軍麻胡濬河
胡虐用其民百姓惴慄常呼其名以恐小

兒小兒夜啼不止呼麻胡來應時止李濟翁資

暇集隋將軍麻胡性酷虐煬帝令開汴河
威稜既盛至童稚望風而畏互相恐嚇曰

麻胡來稚童語
不正轉胡爲胡宋書鄧琬傳劉胡頭面黝

黑似胡蠻人畏之小兒啼語之云劉胡來

便止燉煌新鋒宋質直破虜有威名兒啼

恐之即止舊唐郝玼傳蕃中兒啼者呼玼

名以怖之則止資暇集武宗朝閭閻孩孺
相脅曰薛尹來孫升談圃王德用號黑王
相年十九從父討西賊威名大震西人兒
啼即呼黑大王來以懼之遼史耶律休哥
傳宋人欲止兒啼乃曰于越至矣于越休
哥官名此十一事相類李濟翁言之不詳
故備載之

魏書李冲傳苞蔭之戶可出僥倖之人可止

藝海洞酌云燕王公貴戚多占人爲蔭戶
蔭戶如今之寄田客也又稱蔭人

班固致受金之名陳壽有求米之論見周書
柳蚪傳因學記聞引劉允濟言謂受金事
未詳文心雕龍曰班固述漢因循前業遺
親攘美之罪徵賄鬻筆之愆公理辨之究
矣史通亦云班固受金而始書陳壽借米
而方傳此又記言之奸賊載筆之凶人

學如牛毛成如麟角王厚齋以爲出蔣子萬

機論

蔣子名濟見隋書經籍志

顏氏家訓養生篇北齊

書文苑傳序皆用之唐歐陽詢編緝類書

即名麟角

見新唐書藝文志

而王蔡以之名集

蔡集

皆律賦今有寫本余得之友人吳城新舊兩書經籍藝文志皆不載

舊唐書于志寧傳太宗命貴臣內殿宴怪不

見志寧或奏曰敕召三品已上志寧非三

品所以不來太宗特令預宴即加授散騎

常侍五代史元行欽傳莊宗宴羣臣於內
殿酒酣樂作道平生戰陣事以爲笑樂而
怪行欽不在因左右顧視曰紹榮安在所
司奏曰奉敕宴使相紹榮散官不得與也
莊宗罷會不樂明日即拜行欽同中書門
下平章事二君曲體其臣可謂優遇矣志
寧以直諫顯而行欽死節不屈亦所以報
國哉歐陽公謂死非其志亦深文矣

東坡石鍾山記稱酈道元爲酈元本後漢虞
詡傳注及周書趙肅傳劉知幾亦云水經
加注酈元編而不窮魏書禮志孫惠蔚上
言淹中之經孔安所得孔安國不可稱孔
安孔安別是一人左傳有屠岸夷屠岸復
姓史趙世家索隱述贊曰岸賈矯誅韓厥
立武亦太割裂矣

童謠曰一束藁兩頭然史凡兩見一晉書慕

容熙載記指高雲一北史齊文宣本紀

魏書高祖紀太和十九年詔遷洛之民死葬
河南不得還北於是代人南遷者悉爲河
南洛陽人周書明帝紀二年詔曰三十六
國九十九姓自魏氏南徙皆稱河南之民
今周室旣都關中宜改稱京兆人二君強
民從欲前從相襲若出一轍

古來行孝者多矣而曾子獨爲世所宗法後

漢張霸傳少知孝讓鄉里稱張曾子南史
孝義傳以曾子稱者三人齊宗元欽蔡曇
智滕曇恭南齊書劉瓛傳祖母病疽經年
手持膏藥漬指爲爛母孔氏謂親戚曰阿
稱便是今世曾子

以亞聖尊孟子非定稱也南齊宗室遙昌傳
崔慶遠曰成王有亞聖之賢故周公得輔
而相之隋魏澹傳邱明亞聖之才舊唐姚

崇傳爲遺令以誡子孫云孔邱亞聖母墓
毀而不修關播傳上元中詔擇古今名將
十人於武成王廟配享如文宣王廟之儀
播以太公古稱大賢今其下稱亞聖於義
不安

甘羅十二相秦國策史記無此語見賈公彥
儀禮喪服傳疏不知所本或以甘茂相秦
之故而誤

俗稱名爲學名亦有出處春秋疏引劉炫云
漢承焚書之後諸儒各載學名

急就章疚痾保辜詭呼號顏師古注保辜者
各隨其狀輕重令歐者以日數保之限內
致死則坐重辜也愚按襄七年公羊傳鄭
伯髡原卒於鄆注云古者保辜見辜者辜
內當以弑君論之辜外當以傷君論之疏
云其弑君論之者其身梟首其家執之其

傷君論之者其身斬首而已罪不累家漢律有其事然則知古者保辜亦依漢律律文多依古事故知然也

儀禮公食大夫禮注必長筵者以有左右饌也疏云當席左右其閒容人故謂長筵

魏書孫惠蔚傳先單名蔚正始中侍講禁內夜講佛經有愜帝旨詔使加惠號惠蔚法師此儒臣加僧號之始南史劉勰傳敕與

慧震沙門於定林寺撰經證功畢遂求出
家先燔鬚髮自誓敕許之乃變服改名慧
地陳書徐孝克傳剃髮爲沙門改名法整
此士大夫出家之始舊唐穆宗紀幽州節
度使劉總奏請去位爲僧賜以僧衣賜號
大覺隱逸傳王守慎舅秋官侍郎張知點
推詔獄奏守慎同知其事守慎以疾辭因
請爲僧賜號往成

烏丸鮮卑皆因山而得名魏志烏丸傳注引
魏書漢初匈奴冒頓滅其國餘類保烏丸

山因以爲號焉後魏書序紀國內有大鮮

山因以爲號焉

魏志鮮卑傳注引魏書亦稱別保鮮卑山因號焉

後魏書序紀北俗謂土爲托謂后爲跋因以
爲氏後周書文帝紀其俗謂天爲宇謂君

曰文因號宇文并以爲氏

北史其俗謂天子曰宇文

宋書五行志奉元中小兒以兩鐵相打於土

中名曰鬪族後王國寶王孝伯一姓之中

自相攻擊也

同晉書

北齊書神武紀孝明之

時洛下以兩拔相擊謠言曰銅拔打鐵拔
元家世將末好事者以二拔謂拓拔賀拔
言俱將衰敗之兆

呂氏春秋堯葬穀林通樹之舜葬紀市不變
肆禹葬會稽不變人徒淮南子齊俗訓舜
葬蒼梧不變其肆禹葬會稽之山不易其

畝漢劉向傳堯葬濟陰邱隴皆小葬具甚
微舜葬蒼梧二妃不從禹葬會稽不改其
列

蜀志關羽傳注引典略羽罵孫權曰貉子敢
爾魏書僭晉司馬叡傳中原冠帶呼江東
之人皆爲貉子若狐貉類云周書王褒傳
老羆當道卧貍子那得過資治通鑑引之
亦作貉子胡三省音注貉曷各翻北方有

張仲師
長文二尺
非尺二寸

之似狐善睡孟康曰貉莫白切說文云北方豸種也鄭玄曰貉子曰貍郭璞曰今江東通呼貉爲貍余按北方豸種乃指夷貉之貉孟子所謂大貉小貉者也此乃狐貉之貉

梁書劉杳傳沈約云何承天纂文奇博其書載張仲師及長頸王事此何出杳曰仲師長尺二寸唯出論衡長頸是毗騫王朱建

安扶南記云古來至今不死愚按論衡齊
世篇有張仲師事朱建安扶南記至隋時
其書已亡杳言長頸王亦未詳按諸夷傳
頓遜之外大海洲中又有毗騫國去扶南
八千里傳其王身長丈二頭長三尺自古
來不死南方號曰長頸王

魏了翁疑檀弓李覲疑儒行以爲戰國人作
後漢郭玉傳初有父老不知何出嘗漁釣於

涪水因號涪翁愚按黃魯直謫涪州自號用此

魏書術藝傳隸書見知於閭里者甚衆未有如崔浩之妙又崔玄伯傳清河崔衡字伯玉學崔浩書頗亦類焉又郭祚傳涉歷經史習崔浩之書浩在當時書名之重如此水經注漳水又東北逕西門豹祠前祠東側有碑隱起爲字祠堂東頭石柱勒銘曰趙

建武中所修也文帝述征賦曰羨西門之
嘉迹忽逕睇其靈宇隋書禮志後齊祈禱
者有九焉九曰豹祠愚謂豹以有功德而
祠魏齊之間輒以祈禱而致侵侮魏奚康
生傳爲相州刺史在州以天旱令人鞭石
虎畫象復就西門豹祠祈雨不獲令吏取
豹舌未幾二兒暴喪身亦遇疾巫以爲虎
豹之祟北齊文宣紀天保九年夏大旱帝

以祈雨不應毀西門豹祠掘其冢

舊唐褚遂良傳舜造漆器禹雕其俎困學記
聞云出韓子徐賢妃傳又云漆器非延叛
之方桀造之而人叛

天子即位而爲禪見檀弓天子即位豫作陵
諱之言方中見史酷吏傳蘓林注

魏志鄧哀王冲傳爲聘甄氏亡女與合葬又
邴原傳原女早亡時太祖愛子倉舒亦沒

太祖欲求合葬原辭曰合葬非禮也太祖乃止倉舒即冲字蓋初欲聘原女原不肯復聘甄氏女此禮之失讀禮通考不載

漢禮樂志后土富媪昭明三光張晏曰媪老母稱也坤爲母故稱媪海內安定富媪之功耳舊唐王璵傳廣德二年道士李國禎奏請置大地婆父祠堂梁鎮表云大地婆父祀典無文言甚不經義無可取遼史淳

欽皇后傳童謠曰青牛姬曾避路蓋諺謂
地祇爲青牛姬云大易之文輾轉承襲流
爲里俗之談屢況愈下可發一粲也

莊子逸篇青鵝愛子忘親揚子法言嬰憤母
懷不父懷

晉書慕容儁載記冉閔鑄金爲已象壞而不
成魏書介朱榮傳榮發晉陽猶疑所立乃
以銅鑄高祖及咸陽王禧等六王子孫象

成者當奉爲主惟莊帝獨就又榮既有異
圖遂鑄金爲已象數四不成皇后列傳魏
故事將立皇后必令手鑄金人以成者爲
吉不成則不得立也道武皇后慕容氏鑄
金人成乃立之道武宣穆皇后劉氏以鑄
金人不成故不得登后位明元昭哀皇后
姚氏以鑄金人不成未昇尊位

太皓太靈皆天也後漢郎顗傳太皓悅和雷

聲乃發南齊書禮志仰見太靈俯愜羣望
漢禮樂志西顥沆碭秋氣肅殺後漢祭祀志
作西皓

後漢禮儀志注漢舊儀曰皇帝莫視牲以鑑
燧取水於月以火燧取火於日爲明水火
蓋本周禮
司烜氏又日夏至浚井改水日冬至鑽

燧改火明水改火習聞明火改水希所聞
也

漢賈捐之傳吏民敬鄉元吳師道撰敬鄉前

後錄二字用此

見黃潛所撰墓志而蘭谿縣志載其書

劉昭後漢百官志注童蒙幼子端登槐嶽之位魏書禮志顯槐鼎之至貴彰宰輔之爲重南齊褚淵傳裂邑萬戶登爵槐鼎南齊崔祖思傳槐衮相襲蟬紫傳聲

牲體亦言本末儀禮公食大夫禮載體進奏注云體謂牲與腊也奏謂皮膚之理也進

其理本在前疏云此謂生人食法故進本
本謂近上者若祭祀則進末士喪禮進抵
注云抵本也進本者未異於生也骨有本
末

史夏本紀鴻水滔天索隱曰鴻大也以鳥大
曰鴻小曰雁故近代文字大義者皆作鴻
醢人鄭司農云酏食以酒酏爲餅賈疏云酏
粥也以酒酏爲餅若今起膠餅愚疑起膠

即俗語云發酵

布單衣漢時名爲通裁見士喪禮注及疏

喪大記注統以組類爲之綴之領側若今被

識矣

士喪禮注同

生時禪被有識死者去之孔

疏云領爲被頭側爲被旁識謂記識言綴

此組類於領及側如今被之記識

儀禮喪服傳注娣姒婦者兄弟之妻相名也

長婦謂穉婦爲娣婦娣婦謂長婦爲姒婦

疏云據二婦互稱謂年小者爲娣故云娣
弟是其年幼也年大者爲姒故云姒長是
其年長假令弟妻年大稱之曰姒兄妻年
小稱之曰娣是以左氏傳穆姜是宣公夫
人大婦也聲伯之母是宣公弟叔盼之妻
小婦也聲伯之母不聘穆姜云吾不以妾
爲姒是據二婦年大小爲娣姒不據夫年
爲小大之事也左傳子容之母走謁諸姑

曰長叔姒生男正義曰幼者謂長爲姒也
子容是伯華之子其兄弟伯華最長叔向
次之其餘諸弟皆小於叔向也故謂叔向
爲長叔叔向之妻其年長於子容之母故
稱長叔姒也

伯華爲銅鞮大夫故大戴禮謂之銅鞮伯華
叔向一名譽見檀弓汲冢周書晉平公使
叔譽於周見太子晉而與之言

昌黎所謂鄉先生沒而可祭於社徵於史有
三人焉漢欒布傳復爲燕相燕齊之間皆
爲立社號曰欒公社魏志孔融傳注引續
漢書爲北海相郡人甄子然孝行知名早
卒融恨不及之乃令配食縣社晉書陸雲
傳爲浚儀令去官百姓追思之圖畫形象
配食縣社

漢食貨志六尺爲步步百爲畝陸龜蒙江湖

散人傳云有田奇十萬步自注吳中以二百五十步爲一畝漢唐田畝之制不應懸絕如此

士喪禮注幹竹筩也疏云謂竹之青可以爲繫者釋文筩音笈又燕器杖笠翬注云笠竹筩蓋也疏云筩竹青之皮以竹青皮爲之然則筩即筩也他書多作笈耳

外孫爲外祖作傳陶潛之於孟嘉也見陶集

外孫爲外王母作傳夏侯湛之於辛憲英也見魏志辛毗傳注爲母作傳則鍾會也見魏志鍾會傳注

蜀志王平傳平生長戎旅手不能書其所識不過十字而口授作書皆有意理使人讀史漢諸記傳聽之備知其大義往往論說不失其指後魏楊大眼傳大眼雖不學恒遣人讀書坐而聽之悉皆記識令作露布

皆口授之而竟不多識字也

劉先主販履織席爲席見蜀志先主傳宋武帝在京口賣履爲業見後魏劉裕傳

典略西戎傳匈奴名奴婢爲貲後魏劉裕傳凡蠻夷不受鞭罰輸財贖罪謂之賧又賔

李特傳巴人謂賧曰賔

後魏長孫道生傳子彥少常墜馬

道生曾孫稚稚子子

彥折臂肘上骨起寸餘乃命開肉鋸骨流

血數升言戲自若時以爲踰於關羽五代
史萇從簡傳嘗中流矢鏃入髀骨命工取
之工無良藥欲鑿其骨工遲疑不忍下從
簡叱其亟鑿左右視者皆若不勝其毒而
從簡言咲自若

穴骼投子也見房千里骰子選格序愚謂唐
人力求詭異妄立新名亦如篠驂虬戶耳
荀子哀公篇桓公用其賊文公用其盜楊倞

注謂管仲寺人勃鞞也愚按勃鞞非盜也
韓詩外傳晉文公亡里鳧須從困盜重耳
資而亡荀子蓋指此事

戰國策文公用中山盜而戰勝於城

濮

天下族望無有大於張李者故設甲乙之辭
恒以此二姓爲稱儀禮士昏禮疏某子者
言若張子李子也聘禮疏當賓請事於大
夫之時顯此張子李子之等魏略亦有張

甲李乙之語

俗呼案酒蓋古嘗有此語儀禮鄉射注燕設
陷具所以案酒陸璣詩疏接余鬻其白莖
以苦酒浸之肥美可案酒

漢書趙充國辛慶忌傳贊秦漢以來山東出
相山西出將後漢書虞詡傳諺曰關西出
相關東出將

是書考證經史簡核頗資於學者
之考訂在近年新出諸說部之上
秀峰來揚訪江都汪客有明經見
面而相率置嘗飲於汪對琴比鄰家
擘盃忽大慟舉座為之罷席亦
奇士也焦循記